

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA

Zakonodavno-pravna komisija

Broj: 02/2-02-02-22/17
Sarajevo, 11.01.2017. godine

DOMU NARODA
PARLAMENTA FEDERACIJE BIH

Zakonodavno-pravna komisija Doma naroda Parlamenta Federacije Bosne i Hercegovine na 18. sjednici, održanoj 11.01.2017. godine, razmatrala je:

1. Prijedlog Zakona o sistemu poboljšanja kvaliteta, sigurnosti i o akreditaciji u zdravstvu - skraćeni postupak,
2. Prijedlog Zakona o penzijskom i invalidskom osiguranju,
3. Nacrt Zakona o sigurnosti i zaštiti na radu,
4. Nacrt Zakona o boravišnoj taksi Federacije Bosne i Hercegovine,
5. Prijedlog Zakona o izmjenama Zakona o Komisiji za vrijednosne papire (predlagač: Ismet Osmanović, zastupnik u Predstavničkom domu Parlamenta Federacije Bosne i Hercegovine) – hitni postupak.

U skladu sa članom 51. a u vezi sa članom 56. Poslovnika o radu Doma naroda Parlamenta Federacije Bosne i Hercegovine Komisija podnosi Domu naroda sljedeći:

I Z V J E Š T A J

1. Prijedlog Zakona o sistemu poboljšanja kvaliteta, sigurnosti i o akreditaciji u zdravstvu - skraćeni postupak

U općoj raspravi Komisija je utvrdila da postoji ustavni osnov za donošenje Zakona o sistemu poboljšanja kvaliteta, sigurnosti i o akreditaciji u zdravstvu sadržan u Poglavlju III član 2. pod b) i članu 3. Ustava Federacije Bosne i Hercegovine.

Prema navedenim odredbama predviđene su podijeljene nadležnosti federalne vlasti i kantona u oblasti zdravstva s tim da: federalna vlast ima pravo utvrđivati politiku i donositi zakone koji se tiču ove nadležnosti (član III 3. stav 3); kantoni imaju pravo utvrđivati politiku i provoditi zakone (član III 3. stav 4.); u skladu sa potrebama nadležnosti u oblasti zdravstva ostvaruju se od kantona koordinirano od federalne vlasti (član III 3. stav 1.) pri čemu federalna vlast uzima u obzir različite situacije u pojedinim kantonima i potrebu za fleksibilnošću u provođenju (član III 3. stav 3.).

Komisija podržava razmatranje i donošenje Zakona po skraćenom postupku.

2. Prijedlog Zakona o penzijskom i invalidskom osiguranju

U općoj raspravi Komisija je utvrdila da postoji ustavni osnov za donošenje Zakona o penzijskom i invalidskom osiguranju sadržan u odredbama člana III.2.e), III.3.(3) i člana III.4.j) Ustava Federacije prema kojima su federalna vlast i kantoni nadležni za oblast socijalne politike. Federalna vlast ima pravo utvrđivati politiku i donositi zakone koji se tiču ove nadležnosti, a kantoni su posebno nadležni za provođenje socijalne politike i uspostavu službi socijalne zaštite. Prema odredbama člana IV. A. 20. (1) d) Ustava Federacije Parlament Federacije nadležan je za donošenje Zakona o vršenju funkcija federalne vlasti. Kako je oblast socijalne politike u podijeljenoj nadležnosti između Federacije i kantona, odnosno kako federalna vlast ima pravo utvrđivati politiku i donositi zakone koji se tiču ove nadležnosti, a kantoni su posebno nadležni za provođenje socijalne politike i uspostavu službi socijalne zaštite, to je Zakon dostavljen kantonima na mišljenje. Budući da je donošenje predmetnog zakona od ključne važnosti za Federaciju, u smislu osiguranja finansijske stabilnosti Federalnog zavoda za penzijsko i invalidsko osiguranje i osiguranje redovnosti isplate penzija, kantonima je ostavljen rok od petnaest dana od dana prijema teksta zakona za dostavu mišljenja (12.07.2016. godine), uz napomenu da ukoliko ga ne dostave u navedenom roku smatrat će se da nema primjedbi na Nacrt Zakona. S tim u vezi, mišljenja su do dana slanja zakona u proceduru dostavili Hercegovačko-neretvanski kanton, Kanton Sarajevo, Unsko-sanski kanton, Bosansko-podrinjski kanton Goražde i Posavski kanton. Kanton Sarajevo i Posavski kanton nisu imali primjedbi na Zakon i dali su punu podršku njegovom donošenju. Iz Hercegovačko-neretvanskog kantona data je podrška donošenju ovog zakona, uz određeni broj prijedloga i sugestija većinom nomotehničkog karaktera.

3. Nacrt Zakona o sigurnosti i zaštiti na radu

U općoj raspravi Komisija je utvrdila da postoji ustavni osnov za donošenje Zakona o penzijskom i invalidskom osiguranju sadržan u odredbama člana IV.A.20.(1) d) a u vezi sa članom III.2.e) i članom II.A.2.1) Ustava Federacije Bosne i Hercegovine, Parlament Federacije Bosne i Hercegovine nadležan je za donošenje Zakona o vršenju funkcija federalne vlasti, a prema odredbama člana III.2.e) federalna vlast i kantoni nadležni su za socijalnu politiku.

Prema odredbama člana II.A.2.1) Ustava Federacije Bosne i Hercegovine, Federacija Bosne i Hercegovine osigurava primjenu najvišeg nivoa međunarodno priznatih prava među kojima je i Konvencija Međunarodne organizacije rada broj 155 o zaštiti na radu i radnoj sredini.

Komisija prihvata Nacrt Zakona i smatra da može poslužiti kao osnov za izradu prijedloga Zakona.

4. Nacrt zakona o boravišnoj taksi Federacije Bosne i Hercegovine

U općoj raspravi Komisija je utvrdila da postoji ustavni osnov za donošenje Zakona o boravišnoj taksi sadržan u članu IV. B. 7. a) (IV) Ustava Federacije Bosne i Hercegovine, prema kojem federalna vlast, kada se radi o zakonima i drugim propisima koji su obavezujući na području cijele Federacije Bosne i Hercegovine, ima pravo donositi zakone iz oblasti turizma.

Komisija prihvata Nacrt Zakona i smatra da može poslužiti kao osnov za izradu prijedloga Zakona.

5. Prijedlog Zakona o izmjenama Zakona o Komisiji za vrijednosne papire (predlagač: Ismet Osmanović, zastupnik u Predstavničkom domu Parlamenta Federacije Bosne i Hercegovine) –hitni postupak

U općoj raspravi Komisija je utvrdila da postoji ustavni osnov za donošenje Zakona o izmjenama Zakona o Komisiji za vrijednosne papire sadržan u članu III. 1. tačka c., koji je izmijenjen amandmanima VIII., LXXXIX. i CVI. i članu IV. A 20. (1) d) Ustava Federacije Bosne i Hercegovine, prema kojima je u isključivoj nadležnosti Federacije Bosne i Hercegovine donošenje propisa o finansijama i finansijskim institucijama, a Parlament Federacije Bosne i Hercegovine, uz ostale nadležnosti predviđene Ustavom, odgovoran je za donošenje Zakona o vršenju dužnosti u federalnoj vlasti.

Komisija podržava razmatranje i donošenje Zakona po hitnom postupku.

PREDSJEDNIK KOMISIJE

Jasenko Tufekčić, s.r.